

Շ Ա Հ Բ Ո Ւ Լ Ա Ղ

Շուրիշկանից դէպի հիւսիս, կէս ֆարսախ հեռու, սարերի լանջին մօտ գտնւող մի հովտում ընկած է հայաբնակ Շահբուլաղը. սա փոքրիկ մի գիւղ է 27 տնով և 240 շնչով, որից 110-ը արական է և 130-ը իգական. նրանք գաղթել են 20 տարի առաջ հայաբնակ Միլակերտ գիւղից: Խմելու ջուրն աղբիւրի է, որոնք բղտում են գիւղի հարաւային փէշերից, իսկ արտերը փռւած են գիւղին կից, որոնց համար գործ են ածում Բալասան գետակի ջուրը, որն անցնում է գիւղի հարաւային փէշից, ապա խառնւելով Զայենդէրուզին՝ թեքում է դէպի նոր—Ջուղա:

Հողատիրութեան տեսակը կալւածատիրական է. պատկանում է Միրզա-Հասան, Աղա-Հուսէյն, Աղա-Թաղի, Միրզա Փարզոլլահ, Մատ-Պաղէր, Միրզա-Բաբա աղաներին: Գիւղացիները հողագուրկ են. նրանք մշակում են աղաների հողերը և բերքի $\frac{1}{3}$ մասը տալիս են նրանց, բացի այդ տարեկան վճարում են 100 թուման իբրև պետական հարկ: Հողը հերկում են արօրով և նոյն բոյսերն են ցանում:

Գիւղն ունի Ս. Գրիգոր եկեղեցի, որի մի սենեակը ծառայում է իբրև դպրոց, ուր այս տարի սովորում էին մօտ 20 աշակերտներ: Գիւղում կայ նաև մի ջրաղաց, իսկ արևմտեան կողքին գտնւում է աղայի դաշն:

Այս գիւղում ևս հարստահարութիւնները չափ ու սահման չունեն: Այս տարի Աղա-Մահմատն իր զինւած ձիաւոր խմբով մտնում է գիւղ և զէնքի ուժով առնում է գիւղացիներից 200 թուման փող, 4 ձի և 7 հրացան: Այնուհետև գալիս է Զաֆէր-Ղուլի Զարղամը. սա էլ իր քմահաճոյքի համաձայն հարստահարում է գիւղացիութեանը. առնում է 100 թուման փող և 3 բեռ ալիւր, ապա գալիս է Սաջէ-Շուքր-Օլլան, որ 40 թուման առնելով հեռանում է. իսկ Յունւար ամսին զինւած ձիաւորներով գալիս են Միրզա-Հուսէյն, Հայտար և Ալի-Աբբար խաները, որոնք անասելի